

中國方志叢書·華中地方·第八六八號

據

清·歐陽駿等修，周之鏞等纂
清同治十二年刊本

影印

江 西 省

萬安縣志

(四)

成文出版社有限公司印行

萬安縣志卷十三

儒林

明

蕭時字際雍湖陂人鄉舉任彝陵高郵學正解官歸田
取范氏心箴朱子性要日爲繙閱或偶以道書佐之布
衣疏食望同古人

胡芳號大榮平源人成化丙申選貢授龍游令磊落俊
偉無失明譽不能善事上官繡衣使者恣意威福諸令
望風承旨芳抗不屈遂掛官歸隱引池種菊詩賦自娛
著有陶庵詩集行世

張重號懶雲橫塘人宏治戊午以詩經中第一爲諸生

時直指陳公按吉條陳利弊四事直指從其請賦役糧儲二事遂爲例焉

劉搏號淇園城西人中宏治辛酉鄉試才資明決誦歐陽斗南之詩輒揚髯自喜有豪紳侵占官寺者人莫敢爭搏力辨之事遂寢邑故城垣不修寇至多失建議廣築以備寇患桑公翹從之與兄挺著有聯芳集

劉業號丹峯城西橫街人中正德庚午鄉試積學工詩文從王陽明守仁講學虔中業列高座居家授徒從遊者皆知名士謁選掄郤元授金華府同知隨陞山東長史時王據禮服喪凡吉禮悉命業代之遇恩更四品服遂致仕王喜曰長史愛服致仕洵賢大夫也業歸謝于

謁披書史自譔墓銘

蕭倫字一榮學堂人從學陳白沙獻章九年正德癸酉貢士授建德司訓三載致仕歲時講論於青原白鷺之間邑侯虞守虞師事之有靜觀亭集行世王舜鵬字希元雁塔人以歲貢授益陽訓導沂水教諭乞休性甘苦茹淡敦樸以正家恥事干謁嘗受學王陽明以其說與鄉士大夫博士弟子相證悟砥礪於雲興書院惓惓汲引耄年不倦

鄒士元字志伊湖下人以鄉舉授蘄州教諭遷滕縣令廉介自持知代州以憂去未幾免官遂一意聖賢之學聞安成劉師泉之說尤深契之晚年聚邑人士聯雲興會

久之恍若有得以理學著名有論學緒言五卷行世

劉宗觀號幞山城西橫街人年十六中乙榜十九登嘉靖
癸卯賢書由江陰教諭陞浙江龍泉令好讀書不欲以
吏事苦自陳請改教歷任徽州廬州教授校山西鄉試
陞南京國子助教轉雲南福州二府通判所至皆有能
名

劉崑字敬亭街夏人中嘉靖丙午鄉試歷官蘓州府同
知湛於性理諸書與羅文恭倡明良知之學遠邇學者
推爲敬亭先生崇祀蘓州名宦本縣鄉賢

劉愆號樵梅劉玉季子也嘉靖己酉中順天鄉試常念
先人忠勳欲以獨力請頒卹典初授應天別駕後補順

天別駕因上章得端毅二字之諡喜曰吾先公藉是不
朽矣轉安慶同知陞虞衡員外堅請致仕歲講學於雲
興書院多士景從爲勒名於石

郭春渠字以受少負鉅志家貧不以爲意事親盡歡失偶
不娶以郡學生當次貢學使欲越次拔之固讓曰彼序
在吾上忍奪之耶踰年始貢授南昌訓導陞連江教諭
會有薦者擢國子助教未及任而卒始從鄒文莊守益
羅文恭洪先受學奮勵刻苦至忘寢食沈潛反覆務求
必得數十年無少懈晚歲若有悟貽友人書曰夫性湛
然其足不受染汚者也而過與不及其流行發用也非
性之罪也惟流行發用不能無失故必學焉以易其惡

以協於中此精一之功不容已也學者咸推服云

劉宜載號韶山民方人高才嗜學潛心朱程創嘉會堂於十四都之梅陂與同時劉師泉邦采鄒東廓守益羅念菴洪先講習性學年九十卒

朱道大

府志作大道

字六其西塘人有文譽嘗讀書青原山越

兩春秋不返與鄒南臯元標講學多所發明至今稱焉胡子材號宏宇平源人好學不倦砥礪廉隅鄉人憚之不冠不敢相見人有微青皆私屬曰毋令宏宇知也屢從鄒泗山德溥講學青原有正心誠意論附青原講學錄按府志以此傳爲胡子霖傳列於儒林縣志子霖本傳科名官職符選舉志與子霖事蹟迥別其爲兩人無疑

但字典無霽字查胡氏家譜本名子材後人誤加雨頭耳

張之甲號若谷橫塘人生之先日父夢張橫渠先生至舞勺之歲卽悉心道學後著四子易經蒙引翼纂性理語錄會要一時執經問業者輝映後先之甲爲人弱不勝衣喜言人善畏言人過生平猶司馬君實無一事不可告人者時多疫癘之甲讀禮村落夜半蠟篝翻書窗外聞有數人聲相戒曰張先生正人不可犯也宜避之啟窗視無人次日聞諸疾者皆愈其行格神明如此楊機部萬吉人劉須彌社三先生合訂行狀可考

劉大材號豫林城西橫街人結志詩書尤急於尚義凡高

曾以下無主之喪悉部署如禮深於性理其論學以辨義利爲要以躬行實踐爲先邑侯陳元烈以文行拔萃顏其堂云

匡國祜字受天相俟子少年補弟子員有聲譽宗黨以富貴期之忽謝棄一切篤志聖賢之學晚年踐履益熟尤好成人之美遇人有過必委曲原諒不爲崖岸以故人憚其方正而尤樂其寬宏子大育登康熙戊午賢書

劉應備石洲人性端方言行樸直不徇情勢幼就學西昌楊寨雲家甚器重之曰此子渾金璞玉必爲世寶爲諸生數十年持身謹嚴動止以法家雖貧扶婆孤拯患難則慷慨仗義不愧卮成羊舌之風輿論韙之

朱大夏字元長桂林人衡孫維京子以祖父官勳蔭襲生
長富貴淡若布衣素習舉業屢試不售遂專志理學嘗
曰虎皮講易堪從學絳帳談經自可師治心以鄒文莊
劉三五陽爲法著有桂林軒稿朱氏筆舸等集

朱世灝字淑淳桂林人中崇禎己卯鄉試灝甫數歲祖良
禎沒父蚤以疾廢時甚艱苦受育祖母刻志讀書不事
家業弱冠遊庠輒有聲端方謹厚雖燕居無狎容里黨
每嚴憚之性莊而和故多士樂就藉以成材者眾舉孝
廉請謁不事甘苦如諸生終日危坐沈酣典籍至漏徹
乃罷邑有利害輒力陳於令長然直而不亢當事多悅
從之年四十齋志以沒

國朝

劉完號葆初城西橫街人弱冠補弟子員學使汪瑟菴賞其文刊之嘉慶癸酉應選拔丙子科鄉榜性樸質淡泊自甘無意宦途設教鄉塾課士以器識爲先作文取法古大家故登科甲者半出其門後任義甯州學正十四載樂育情殷士心深洽未老致仕朝夕猶手不釋卷遠邇咸欽品學焉年六十七歲卒於家

方肇苑號藝圃雲洲人邑增生學問淹博品行端方以家多故無意上達廬居受徒教讀六十餘載造就多材年逾八旬值寇變蹂躪日甚遂深隱山林每曉諸生以大義復令其子千里荷戟從軍屢戰敗賊賊謀執苑殺之

逼令其子罷兵免死苑引領就戮毫無懼色挫折竟曰
終不屈賊目梁姓者義之因釋焉厥後重游泮水年臻
九十卒長孫東明國子生次孫東晞年幼入庠輒有聲
何彬號雅園蕉源人歲貢生刻志詩書沉心理學外事
毫不與聞以明經老多士景從咸沐化雨焉道光五年
舉鄉飲正賓年六十四而卒子觀衢郡庠生謹守庭訓

克承父志

新纂

張光斗號紫垣橫塘人邑增生博通經史品行端方教授
生徒以躬行實踐爲先文藝次之長於詩相唱和者皆
郡邑名士有橫溪詩集太史札公序以行世年九十卒
於家子孫繩繩克紹書香

新纂

朱琦號克齋桂林人恩貢生秉質聰敏潛心學問品行清高文章醇雅屢科呈薦未售以明經終老設教鄉里造就諸生遊泮食餼者多多益善年八十一而卒子隆義邑增生接紹書香至今未墜

新纂

朱隆元號善甫桂林人歲貢生天資高邁經傳子史靡不博覽入棘闈屢膺鶚薦因格滿見遺老於明經課士以先器識而後文藝凡邑中學優品端者不卜而知爲先生弟子也年七十六而終子孫俱入膠庠

新纂

增補

明

陳憲號古愚泗源人郡博士天順甲申拔貢廷試優等

授鄧州武岡兩學正學問淵博襟懷洒落課士循循善
誘人咸以春風化雨稱之至處已接物溫恭和藹使人
如飲醕膠不覺自醉凡議事必笑而定可否珉王初見
而異之久而察其嘉言懿行莫不如是賜號一笑先生

文苑

宋

劉 睿永和鄉人性醇潔漁獵經史嘗著春秋四庫及河

圖表裏諸編熙甯十四年有司以明經薦授本縣龍溪

書院山長後擢教諭

賴繼善南乾人工於文著有毛詩談餘尙書約旨行世客

有談楊邦乂死杜充降者繼善感咏有白日干戈萬馬

塵鐵心不碎竟誰身之句

賴廷簡南乾人紹興丙子吉州解試兩赴京闈不遇嘆曰

奸佞立朝豈君子行道時哉創書院於韶江之濱日聚

生徒相與講論所著有瑤林集

賴子平南乾人翰林典校博通載籍有雲溪集治性編尙
書詮解行世弟子成官國子學諭兄弟皆有文名

賴之美南乾人嘉定吉州解試赴京闈不第遂浩然歸曰
天示角端世事可知正杜門時也遂研究理學有遵堯
紹舜錄五卷煨燼稿五卷

賴繼文南乾人號自求居士敦氣節常讀太學生陳東所
上書請誅蔡京童貫等有吟曰丈夫何事未承明闈闔
高敲吐憤聲志行所勵以嚴見憚焉

賴尹宣南乾人咸淳間領吉州鄉薦又中京闈時勅贈曰
重將丹桂折兩着錦衣歸螺川王學士嘆曰是真不愧
科名矣